

Frieda Düsterbehn-Reuting:

# HÖCHSTER SCHERWE

Geschichten aus dem alten Höchst

SOCIETÄTS**VERLAG**

## Vom heilige Antoni.

Drauß warsch noch helle Dag, awwer in dem Eckelche von de Kerch, bei de Aldeweiwerstiehl, wo de heilig Antoni sitzt, warsch ganz dunkel. Un so schwiel, wie selde in ere Kerch, wo so viele Leit im Sommer blos eneingehn, weils kiehler drein is, als wie in annern Heiser.

De heilig Antoni hot sich e bissi gestreckt, nadierlich muß er acht gewwe, daß em sein Buch nit erunnergeritscht is, un hot de Kopp in die Heh gedahn un geschnuffelt, als wie wanner was rieche deht. 's war kaan Weihraach, des war er gewehnt, un wie er noch e bissi geschnuffelt hatt' nooch dem klaane, offene Dierche zu, do hot er bei sich gedenkt: Aha, die Linde bliehe! –

Es war em mit de Zeit alles aans worn, ob's drauß geregent hot odder geschneit, ob se Wickelkinner an em ve'beigetragte hawwe odder Dode; aach die heilig Margeretha iwworm Aldar, die nix konnt, wie mit ihm helzerne Spieß nooch ihm Lindworm giekse un e hochgestoche Gesicht dezu mache. – Er hot ruhig dogesesse un im Stille simeliert. Besuch hot er eigentlich de mehrscht gehatt von all seine Kollege in de Kerch, dann warum? –: Wann aans was ve'lorn hatt', es konnt des Portmaneh sein, de Treiring odder blos en Fingerhut, do hot er e Kerz odder e Kerzi kriecht. Do hot er sich als gefreit un aach emol e bissi noochgedenkt, wo des ve'lorn Ding kennt hinkomme sein. –

De heilig Alowisius, no ja, bei den is die Jugend gange, der hot die mehrschte junge Gesichter gesehn, – awwer er!

Ausgerechent bei de Aldeweiwerstiehl! Un Weiwer warn des – no, ihr wißt jo, von dene, wo bei de Brozession hinne gehn – warum? –: 's hot's emol en alde Mann seim Kamerad ve'zehlt, wie se nooch de Meß enaus sein; ins Ohr, de heilig Antoni hot nix devon ve'stanne, awwer er hot die zwaa dann ferchterlich lache heern...

Mer brauch net alles ze wisse un nooch allem ze froge, mer muß was uff sich halle, wammer de heilig Antoni is un aaner von de Ällste in de Kerch. Grad wammer alt is, do is e ruhig Plätzi was wert, do hinner de Dier warsch gar nit iwwel, un uff alle Fäll: Die Lindelieth hot kaaner von seine Kollege geroche!

Wie des de heilig Antoni so bei sich iwwerlegt, kemmt e klaan Meedche von e Jahrer siwwene, e Kerzi in de Hand, dem Dierche

ereingetrappelt. Es steckt ganz scheen sein Kerzi in des Eise, wo's hingeheert, kniet sich dann dezu, leht sein Händelcher zesamme un guckt em heilige Antoni grad ins Gesicht.

Der lacht so e bissi un secht: „No, mein klaan Maad was hot du dann ve'orn? Ve'zehl mersch emol.“

„Ei mir hawwe“, secht des Kind un flennt, „ei mein Mutter, – unser klaan Briederche is gestorwe, un die Mutter flennt de ganze Dag, un mir wolle widder e klaan Briederche hawwe.“

„So. Un die Mutter hot bos noch dich?“

„Naan, ich hab noch e groß Schwester, die dient beim Herr Borjemaster.“ –

„No, jetz flenn nit mehr. Guck emol, jetz hoste mer des scheen Kerzi gebrocht –“

„Ja“, secht die Klaan un lacht schon widder, „s hot verzig Penning gekost.“

„– also geh haam un sag iwwer dein Mutter, sie kreegt widder e klaan Kinnche, – uff alle Fäll – was is dann dein Vatter?“

„Mir hawwe kaan mehr, der is aach gestorwe.“ –

– Do hot de heilig Antoni dem Kind grad nor so gewunke, es soll enausgehn. Un dann hot er sich hinner de Ohrn gekratzt, daß em sein Heiligeschein in die Ank geritscht ist un's is em ganz schwiel worn in seine wollene Kutt. –

Uff aanmol hot's widder gerumbelt un gerasselt von dem Dierche her, un erein kemmt en Barmherzige Bruder mit emre Weißbinner, der hot e Laader an die Wand gestellt un en Aamer denewer, un de Lehrbub hot noch en Binsel un so Zeig gehatt.

„Also morje frieh um sechs Uhr fange mer aan“, hot der Weißbinner zu dem Bruder gesacht.

„Ja, un eilt eich e bissi, 's muß alles ferdig sein uff de Margerethedag“, secht de Bruder un dann sin se all mi'nanner widder enaus.

„Jetz gnad mer Gott“, hot de heilig Antoni gedenkt, „die Kerch werd geweißt odder zem wenigste mein Eckelche do. Des wär mer noch scheener, all den Speis un die Dinch un den Dreck de ganze Dag uff de Kopp un im beste Fall noch zugehenkt wern mit eme alte Aldarduch bei dere Hitz. Naan, ihr Leit, des kennter nit ve'lange; jetz heeßt's: Alterche, mach dich per!“

Er hot awwer noch e bissi gewaart, so bis um e Uhre neun, wie's dunkel worn is. Dann is er langsamche erunnergekrawwelt von seim Aldärche, hot sein steife Knoche zerechtgeschittelt un is sich emol mit ere Handvoll Weihwasser iwwers Gesicht gefahrn. En Aageblick

hot er noch iwwerlegt, ob er sein Heiligeschein mitnemme sollt. Er war e bissi schwer, awwer schließlich hot ern for alle Fäll doch unner seine Kutt ve'steckelt. –

Jetz enaus, dorchs Klostergässi un an die Stadtmauer. Grad wie er dorchs Dor will, schießt wie de Deiwel e Meedche an em ve'bei in eme weiße Scherz un leeft enaus, wo's in de Gäärte un dann ins Feld geht. De heilig Antoni is vor Schrecke hinner en Hollerbusch gehippt un grad wie er widder evor will, leeft en Borsch an em ve'bei un schnurstracks aach em Dor enaus. –

Dann awwer hot sich de heilig Antoni doch enaus getraut un werklisch, 's war kaan Mensch ze sehn. Es war e Ruh un en Friede iwveral, die Hammelmais hawwe gezerpt un die ganz Welt hot nooch Lindebliethe geroche. Un bei dem Geruch is em heilige Antoni sein dunkel Eck un des klaane Meedche widder eingefalle un aach des Kind, wo er dere Wittfraa ve'sproche gehatt hot.

Die Gedanke an sein Rebedazion hawenem schwer uff de Seel gelehe, awwer die Lindeblieth war schuld, er konnt uff aanmol gar nix mehr denke un war ganz narrisch un dormelig im Kopp.

So is er weitergedappt, un wie er gesehn hot, daß jetz des freie Feld aanfängt, is er am Borjemaster seim Obstgaarte stehn gebliwene un hot en Aageblick ausgeschnauft. Uff aanmol is er ve'schrocke. Ei wer steht dann do? – 's war blos e Vogelscheich, awwer sie hot akkerat de Bauch vom Borjemaster gehatt un aan von seine aale Hiet uff, korzum, de heilig Antoni hot laut lache misse.

Do duht's in de Neh en mordsmäßige Krisch, mer heert was forlaafe un dann war widder alles ruhig, nor die Hammelmais hawwe weitergezerpt. –

Dann is de heilig Antoni so langsam e bissi abwärts komme ins Feld. Er war doch des Gehn nit gewehnt un hot sich nooch eme Plätzi umgeguckt, wo er sich emol setze kennt. So velleicht hunnert Schritt weiter hot er was gesehn wie e Heisi, es hot so e spitz Dächelche gehatt, beinah wie e Kabelleche. Freilich, wann's so was war, do dorft er jo nit hingehn, er hätt en Kolleg drein treffe kenne, no un dann? – des kennt er eich denke! Awwer er is doch ganz vorsichtig druff zu un hot debei mit de ausgestreckte Händ vor sich gegriffe, dann viel sehn konnt mer nit mehr. Er greift in Efeiblätter un greift aach in so was wie en Schnorrbart... Jetz hot er awwer doch en Dodsschrecke krieht, un hot sich so scheniert, daß er gesacht hot:

„Och, nix for ungut, ich such e paar junge Efeiblätter for mei Fieß – ! Hawwe Sie aach Hiehneraage?“

„Warum? Wolle Se sich velleicht druffstelle, daß Se besser gucke kenne, Sie –“, secht der an de Mauer un packt de heilige Antoni vorne aan, fiehlt den lange Bart un des Saal um sein Leib un stoddelt ganz ve'bliift:

„Gelobt sei –“

„In Ewigkeit, Amen“, secht de heilig Antoni un drickt sich um's Eck uff die anner Seit von dem Heisi. Des war nooch em Weg zu's ganz offe, un de heilig Mann hot jetzt nix mehr iwverlegt un sich vor nix mehr gefeucht', sein Fieß hawwen kaum noch getrage, er stolpert enein ins Heisi un dabbt was vor sich wie e staanern Bank – 's konnt frieher e Aldärche gewest sein odder sowas zum Abstelle for de Bauerschweiwir ihr Mahne. No kurzum, er is e bissi gehippt un is aach glicklich enuff komme. Ganz scheen in die Mitt von dem Staan un dann hot er noch so viel Besinnung gehatt, daß er sich sein Heiligeschein uffsetze konnt. „So, jetzt kann komme was will“, hot er noch vor sich hingemormelt, dann hot er sein Händ zesammegeleht un wär aach beinah e bissi egedusselt.

Awwer er is nit so weit komme. Die vorm Heisi – dann do war nit blos des Mannsbild mit dem Schnorrbart, es war noch jemand debei – die konnte denke, der Bruder odder Kappeziner odder was es war, is de Weg weiter gange. Sie hawwe nix Ve'dächtiges mehr geheert un hawwe sich uff alle Fäll nor halwer so scheniert, wie vorhin de heilig Antoni.

Un was der ausgestanne hot den Owend in dere Lindeblieth, – ihr habt jo sein Lewensbeschreibung gelese, awwer des war all Dreck dodegege. –

Es hot dann in dere Nacht noch e Gewitter gewwe un hot drei Dag in aam Stick fort geregent. An des Heisi is in dere Zeit kaan Mensch komme un des war gut. Un am dritte Dag, owends wies dunkel war, do hot de heilig Antoni sich uff allerhand Schleichweg widder haamche gemacht in sein Kerch. – Sein Plätzi war fein geweißt un ferdig.

Un am Margerethendag, wie die Kerch aus war, do is de allerletzt noch e Meedche komme un hot sich vor de heilige Antoni hingekniet. Sie war ganz ve'dattert un de heilig Mann hot se aach erscht e bissi zawwele losse, bis er gesacht hot:

„No, Meedche, was fehlt der dann, de host doch nix ve'lorn?“

Do fängt des jung Ding ganz ferchterlich an ze flenne.

„Och heiliger Antoni, helf mer doch, helf mer doch!“

„Ja, lieb Kind, was is do ze mache, for so Sache bin ich nit ze brauche, awwer ich will emol nit so sein. Host du mich enein gebrocht in die Bredullje, hoste mich aach widder eraus gebrocht. Gell, des ve'stehste nit? No, 's schadd nix. – Geh nor jetz haam, un wann dein Mutter schennt, so sechste, de kennst nix defor, dein klaan Schwesterche hätt's beim heilige Antoni bestellt.“